

'Selangkah Ke Menara Gading'

Sharifah Nur Halimatul rangkul Anugerah Khas Terbaik Keseluruhan

OB 23.10.2019 7

LABUAN: SMK Labuan mengadakan Majlis Graduasi Pusat Tingkatan Enam SMK Labuan 'Selangkah Ke Menara Gading' di Palm Beach Resort and Spa, malam Ahad lalu.

Majlis yang bermula jam 7.30 malam itu dirasmikan Timbalan Dekan (Hal Ehwal Pelajar dan Alumni), Fakulti Kewangan Antarabangsa Labuan (FKAL), Universiti Malaysia Sabah, Kampus Antarabangsa Labuan (UMSKAL) Dr Suzillah Sidek.

Turut hadir Pengetua SMK Labuan Ismail Abdullah, Yang Dipertua PIBG SMK Labuan Haji Md Yusof Haji Chuchu, Penolong Pengarah Sektor Pengurusan Sekolah Jabatan Pendidikan Wilayah Persekutuan Labuan (JPWPL) Sahbudin Ag Muhammad dan Penolong Kanan Pusat Tingkatan Enam SMK Labuan Saminan Sabtu.

Majlis itu dihadiri 136 pelajar Tingkatan 6 Atas, 60 ibu bapa dan 38 pensyarah Pusat Tingkatan Enam SMK Labuan.

Dalam ucapannya, Ismail berkata Majlis Graduasi Pusat Tingkatan Enam ini bukan setakat untuk menjadi kenangan manis dan nostalgia kepada para pelajar, tetapi juga sebagai perangsang dan semangat untuk melanjutkan pengajian ke peringkat seterusnya.

Beliau berkata prestasi Pusat Tingkatan Enam SMK Labuan berada pada tahap baik dengan peningkatan Gred Purata Sekolah dan bilangan calon yang mendapat PNGK 3.00 ke atas juga meningkat.

Katanya, Kohort STPM 2018 mencipta sejarah STPM Pusat Tingkatan



TERBAIK KESELURUHAN: Dr Suzillah menyampaikan Anugerah Khas Terbaik Keseluruhan kepada Sharifah Nur Halimatul sambil diperhatikan Ismail.

Enam SMKL apabila Farah Ain Nabila Roslizar berjaya mendapat keputusan sempurna PNGK 4.00. Kini Farah Ain sedang mengikuti program Ijazah Sarjana Muda Perniagaan Antarabangsa dengan kepujian (Kewangan Antarabangsa) UMSKAL.

Jelas Ismail, jumlah pelajar STPM 2018 yang dapat melanjutkan pengajian ke IPTA dan IPTS juga melebihi tahun sebelumnya yang berjumlah 75 orang.

"Kita doakan agar pelajar-pelajar kohort ini juga akan dapat mencapai kejayaan lebih baik daripada kohort yang lepas. Kita masih mengimpikan PNGK 3.00 yang belum kesampaian.

"Pelajar-pelajar perlu ingat jika kita dapat mencapai PNGK 3.00 tahun ini, maka nama Jabatan Pendidikan Labuan akan berada di tempat teratas dalam ranking pencapaian mengikut negeri di seluruh negara," katanya.

Sementara itu, Dr Suzillah berkata semua sedia maklum akan dunia pendidikan yang semakin mencabar selari

dengan kemajuan dalam pelbagai aspek terutamanya dalam pembangunan negara.

Katanya, pelajar pada hari ini menggalas tanggungjawab bukan sahaja untuk belajar tetapi dibimbing dan dididik untuk menjadi pewaris negara agar dapat menjadi modal insan yang bukan sahaja berilmu tetapi mempunyai akhlak dan sahsiah yang terpuji. 'Pemuda harapan bangsa, pemudi tiang negara', begitulah harapan yang disandarkan kepada anak-anak generasi pada hari ini.

Suzillah berkata majlis graduasi dan peperiksaan STPM adalah satu titik permulaan kepada sebuah perjalanan yang bakal diterokai oleh para pelajar.

Tambah beliau, peluang pendidikan dan kemudahan yang disediakan sewajarnya dijadikan sebagai batulanatan kepada pelajar supaya dapat menguasai ilmu, kemahiran dan membina personaliti yang cemerlang.

Katanya, pelajar-pelajar seharusnya berupaya

menggunakan kelebihan yang ada bagi merealisasikan impian masing-masing untuk cemerlang dalam peperiksaan STPM tidak lama lagi.

"Dengan semangat yang jitu, adalah penting bagi pelajar-pelajar untuk menzhahirkan kejayaan melalui usaha yang berterusan," katanya.

Pada majlis itu, Anugerah Kokurikulum Terbaik Lelaki diberikan kepada Mohamad Azuan Izack manakala Anugerah Kokurikulum Terbaik Perempuan disandang Nur Nabilla Hartono.

Irham Zulhilmi Mohd Johan pula meraih Anugerah Khas Kepimpinan manakala Anugerah Khas Terbaik Aliran Sains (Amy Siah Hui Bee).

Anugerah Khas Terbaik Aliran Kemanusiaan diberikan kepada Sharifah Nur Halimatul Sa'adiyah Wan Muslim.

Beliau sekali lagi menaiki pentas apabila dipilih sebagai penerima Anugerah Khas Terbaik Keseluruhan 2019.



ALBUM: Semua penerima anugerah bersama Dr Suzillah (tengah), Ismail (empat kiri), Yusof (tiga kanan), Sahbudin (empat kanan) dan Saminan (tiga kiri).



GRADUAT: Pelajar-pelajar Tingkatan 6 Atas yang menyertai Graduasi 2019.



PENSYARAH: Sebahagian pensyarah yang menghadiri Majlis Graduasi Tingkatan 6.